

東
華
續
錄

東華續錄

嘉慶四十二

臣王先謙敬編

臣周潤蕃恭校

秋七月庚戌諭朕於二十二日降旨令那彥成回家省視伊母不准外人前往看視那彥成慶旂二十三日前往看門兵丁曾向攔阻伊自稱本家堅欲進門若謂看視那彥成之母其母係於二十日到京何以不於二十二日以前往看慶旂捏詞掩飾顯係違旨且年力衰頹著卽照部議革職○乙卯賜英吉利國王敕諭曰爾國遠在重洋輸誠慕化前於乾隆五十八年先朝高宗純皇帝御極時曾遣使航海來庭維時爾國使臣恪恭成禮不愆於儀用能仰承恩寵瞻覲筵宴錫賚便蕃本年爾國王復遣使肅奉表章備進方物朕念爾國王篤於恭順深爲愉悅循考舊典爰

飭百司俟爾使臣至日瞻覲宴資悉倣先朝之禮舉行爾使臣

始達天津朕飭派官吏在彼賜宴詎爾使臣於謝宴時卽不遵禮
節朕以遠國小臣未嫻儀度可從矜恕特命大臣於爾使臣將次
抵京之時告以乾隆五十八年爾使臣行禮悉跪叩如儀此次豈
容改異爾使臣面告我大臣以臨期遵行跪叩不至愆儀我大臣
據以入奏朕乃降旨於七月初七日令爾使臣瞻覲初八日於正
大光明殿賜宴頒賞再於同樂園賜食初九日陛辭並於是日賜
遊萬壽山十一日在太和門頒賞再赴禮部筵宴十三日遣行其
行禮日期儀節我大臣俱已告知爾使臣矣初七日瞻覲之期爾
使臣已至宮門朕將御殿爾正使忽稱急病不能動履朕以正使
猝病事或有之因止令副使入見乃副使二人亦同稱患病其爲
無禮莫此之甚朕不加深責卽日遣令歸國爾使臣旣未瞻覲則

爾國王表文亦不便進呈仍由爾使臣齎回但念爾國王數萬里外奉表納貢爾使臣不敬恭將事代達悃忱乃爾使臣之咎爾國王恭順之心朕實鑒之特將貢物內地理圖畫像山水人像收納嘉爾誠心卽同全收並賜爾國王白玉如意一柄翡翠玉朝珠一盤大荷包二對小荷包八箇以示懷柔至爾距中華過遠遣使遠涉良非易事且來使於中國禮儀不能諳習重勞唇舌非所樂聞天朝不寶遠物凡爾國奇巧之器亦不視爲珍異爾國王其輯和爾人民愼固爾疆土無閒遠邇朕實嘉之嗣後毋庸遣使遠來徒煩跋涉但能傾心效順不必歲時來朝始稱向化也俾爾永遵故茲敕諭○諭此次英吉利國進貢使臣至天津海口登岸特命蘇楞額廣惠傳旨賜宴令其謝宴行三跪九叩禮如合式卽日帶領來京如不諳禮儀具奏候旨其原船勿令駕駛仍由原路回津

海還國蘇楞額廣惠故違旨意徑行帶來又縱令原船私去伊二人之咎在此因事已不妥又命和世泰穆克登額迎赴通州演禮以七月初六日爲限限內如儀再行帶來滿限尙未如儀卽行參奏候旨和世泰穆克登額於初五日含混具奏初六日徑行帶來朕於未初二刻御勤政殿召見伊二人先詢以演禮之事伊二人免冠挫頭云並未演禮及至再問以既未演禮何不參奏和世泰云明日進見必能如儀此一節伊二人之咎已同前二人矣至初七日早膳後卯正二刻朕傳旨升殿召見來使和世泰初次奏稱不能快走俟至門時再請二次奏稱正使病泄少緩片刻三次奏稱正使病倒不能進見卽論以正使回寓賞醫調治令副使進見四次奏稱副使俱病俟正使全愈後一同進見中國爲天下共主豈有如此侮慢倨傲甘心忍受之理是以降旨逐其使臣回國不

治重罪仍命廣惠護送至廣東下船近日召見廷臣始知來使由
通州直至朝房行走一夜來使云進見朝服在後尙未趕到便服
焉能瞻謁大皇帝此等情節和世泰見面時何不陳奏卽或遺忘
或晚間補奏或次日一早具奏俱可直至將次升殿總未奏明情
節伊二人之罪重於蘇楞額矣若豫先奏明必改期召見成禮而
返不料庸臣誤事至此朕實無顏下對臣工惟躬自引咎耳四人
之罪俟部議上時再行處分先將此旨通諭中外及蒙古王公等
知之尋議上得旨蘇楞額革去工部尙書鑲紅旗漢軍都統加恩
以三品頂帶降補工部左侍郎仍留總管內務府大臣廣惠降內
務府八品筆帖式和世泰革去理藩院尙書鑲白旗漢軍都統仍
留公爵總管內務府大臣穆克登額革去禮部尙書鑲黃旗漢軍
都統降補鑲黃旗漢軍副都統○以和甯爲工部尙書

由都統遷

○丙

辰以戴聯奎爲左都御史轉王鼎爲吏部左侍郎以茹葵爲吏部

右侍郎○丁巳以馬慧裕爲禮部尙書

由署湖廣總督左都御史遷

○以慶溥

爲理藩院尙書景祿爲左都御史

由工部左侍郎遷

○以張映漢署湖廣

總督

出湖北巡撫兼署

○辛酉諭軍機大臣等賽沖阿等奏據廓爾喀國

王來稟已與披楞講和趕辦貢物稟求示期進獻情詞極爲恭順等語廓爾喀與披楞和議已成彼此息爭邊境甯謐賽沖阿奏請俟披楞稟覆到日卽行回川計此時披楞覆稟應已到藏該將軍查看無事卽回成都本任至廓爾喀備辦表貢請示期進獻該國係久經臣服之國豈有因此一事令添備一貢之理卽諭以該國與披楞連年搆兵今和議甫成得以安輯大皇帝體恤藩服俾令休養安息此時無庸趕辦貢物仍遵照一定貢期於嘉慶二十二年差噶箕頭目於年內到京照例朝覲以示懷柔該將軍等接奉

此旨卽檄諭該國王祇遵可也至披楞旣與廓爾喀講和將來稟
覆諒無異說如稟詞極爲恭順著由四百里具奏如尙有應行查
辦之處由五百里具奏無庸再發六百里急遞致駭聽聞也○壬
戌以程國仁爲甘肅布政使張五緯爲山東按察使由直隸天
律道遷○

乙丑 上啓鑾秋獮木蘭○免經過地方額賦十分之三○辛未

上駐蹕避暑山莊○以汪守和爲內閣學士

由詹
事遷

八月壬辰 上自避暑山莊巡幸木蘭行圍○甲午諭木蘭圍場

自 聖祖仁皇帝肇開其地歲時獮狩講武詰戎內外扎薩克蒙
古藩部王公等齎輶隨行以將其忠君親上之忱 恩施優渥賚

予便蕃典至重也我 皇考高宗純皇帝六十年率循弗替 聖

製避暑山莊後序以木蘭行圍繫於綏藩肆武者至鉅 垂訓後

嗣俾世世遵行朕恪循 成憲每歲舉行旣躬習勤勞並以撫綏

藩服訓練軍伍此與 祖訓勿改衣裳騎射同爲我國家根本之計 列聖詒謀所當萬年遵守者乃上年自熱河啓蹕之日縣課有雨水衝慢橋梁之奏意圖停止進哨特降旨將縣課革去御前大臣示以罰懲本年田京啓鑒以後兼旬晴霽乃又有以閏月節候較早哨內寒冷爲詞者除御前大臣軍機大臣均無此言外卿貳京堂及直隸道府內頗有其人此不獨欲以消惑朕聽且以阻撓眾志是誠何心直同背畔矣此次進哨以來風日暄和毫無雨雪見已行圍過半氣候並未凝寒本日特召見皇子御前大臣軍機大臣宣諭此旨總以歲舉秋獮係我朝 家法必當永遠遵循嗣後每遇進哨大小臣工槩不准以雨水寒冷爲詞妄生浮議屆期如實有應行停減之處朕自行降旨儻有敢於嘗試仍復造作浮言希圖阻止者則行圍之事與行軍等必將其人按軍法治罪

立正典刑不稍寬貸將此通諭知之○諭據徐錕奏方受疇姚祖同因本年逢閏節候較早恐哨內天氣寒冷公捐棉衣二千件爲分賞辦差兵丁之用此舉大屬非是朕巡幸木蘭歲以爲常五年再閏從前逢閏之年歷次舉行秋獮從無加賞兵丁棉衣之事方受疇等創爲此舉後將援以爲例若不能爲繼兵丁等將以此生怨且緣營兵丁由伊等捐賞所有隨扈八旗兵丁又將誰爲捐給乎方受疇姚祖同市惠邀名而不計沮惑眾心有乖政體俱著嚴行申飭仍交部議處○己亥禮部尙書馬慧裕卒贈太子少保予祭葬○以成甯爲禮部尙書

九月丁未朔復松筠太子太保○庚戌諭朕每御行營自御前大臣至御前乾清門侍衛等均各佩撒袋隨扈御前大臣繇恩因其年老特加恩不令佩帶卽御前大臣等有豫備手帕差使亦無不

佩撒袋之例嗣後御前大臣等不得藉豫備手帕不佩撒袋奕紹雖有管理鑾儀衛差使究係乾清門行走伊因途閒豫備轎車竟不佩撒袋且如朕在途閒更換轎馬不惟御前乾清門大臣侍衛等均各佩撒袋下馬豫備差使卽從前御前乾清門大臣內亦有兼管鑾儀衛之員並無推故不佩撒袋者今奕紹止圖便於豫備差使竟不佩撒袋甚屬懶惰本年哨內管理圍場事務亦屬平常奕紹著退出乾清門仍罰職任俸半年嗣後除有豫備鑾儀衛差使毋庸佩撒袋外其帶領豹尾槍差使亦照舊例佩帶撒袋○壬子 上駐蹕避暑山莊○諭那彥成從前屢獲咎愆經朕棄瑕錄用復升任陝甘總督自當竭盡愀忱力圖報效卽地方遇有格礙難辦之事亦應據實陳奏請旨遵行乃聽信陳祁之言那移賑銀十九萬餘兩以爲津貼採買腳價等項之用實屬膽大妄爲經刑

部問擬斬監候將應賠銀三萬九千八百兩勒限一年全完請旨
應否免罪茲已於一月內繳完惟那彥成係屬大員雖有滑縣勦
賊微勞不能卽予免罪仍當發往伊犁姑念伊母年老病篤那彥
成著加恩暫免發遣卽行釋放令其在家終養伊子容照容恩前
以那彥成獲咎黜革茲那彥成既經釋放伊子並無他咎著各降
一等容照賞給三等侍衛在大門上行走容恩以上虞備用處拜
唐阿用○乙卯 上自避暑山莊回鑾○戊午 上閱古北口兵

○己未陳希曾以疾免以陸以莊爲工部右侍郎彭希濂爲左副
都御史○以瑞弼爲直隸按察使

由熱河
道遷

○庚申調瑞麟爲浙江

布政使以李廣芸爲福建布政使麟祥爲福建按察使

由浙江甯
紹台道遷

○壬戌

上還京師

○丁卯諭軍機大臣等賽冲阿等奏廓爾喀

王專遣噶箕恭進表貢披楞部長頭人遵檄稟覆見在兩國講和

邊界甯謐並遵旨撤兵回川各一摺覽奏欣慰此時廓爾喀與拔楞兩國和議已成拔楞來稟並有與廓爾喀更加和好永遠和睦之語彼此自可息爭邊境甯謐至廓爾喀貪詐刁頑卽或另起爭端亦與天朝無涉其來稟稱有事總欲稟知此時儘可付之不答將來卽有稟求之事亦仍置之不問惟當加意訓練漢番兵丁慎守邊疆是爲至要至廓爾喀貢期著仍遵照諭旨於嘉慶二十二年差噶箕頭目於年內到京照例朝覲見在該二國俱已恭順服從邊圉敕甯賽冲阿著加恩賞還雙眼花翎頭品頂帶喜明阿什克俱賞還二品頂帶喜明並賞還花翎賽冲阿見已撤兵帶同成都到省後卽將將軍印信交常明兼署起程來京陛見計算程期如年內可以至京卽作爲本年年班至該將軍等此次帶往將弁及文武官員等並未著有勞績有何可鼓勵之處不准保奏一人

喜明於查閱營伍後亦卽回前藏供職也○王申 上臨故御前大臣拉旺多爾濟第賜奠

冬十月丙子朔諭軍機大臣等蔣攸銛等遵旨覆奏辦理英吉利貢使到粵回國事宜一摺英吉利國貢使不能行謝宴禮儀乾隆五十八年到粵時並未給與筵宴此次自無庸強令入宴行禮該督等所奏頒賞使臣筵席三桌仍賞給牛羊等物所辦甚是至另片所請再行頒發諭旨宣明該貢使等失禮之咎令該國王自行查辦殊可不必前該督所奏刊刷告示發給該國來粵貿易各船朕卽諭以六合之外存而不論降旨飭令停止該督尙未接到復爲此奏總之此事蘇楞額一誤於前和世泰再誤於後朕權衡裁度恩威並濟厚往薄來辦理已爲允協此後無庸多煩詞說該貢使如此狡詐卽頒發諭旨伊歸國後亦豈不能隱匿捏造虛詞以

自文其過竟當置之不論較爲得體俟該貢使到粵該督於接見時當堂堂正正諭以此大爾等奉國王之命來天朝納貢不能成禮卽屬爾等之咎仰荷大皇帝深仁大度不加譴罰仍賞收爾國王貢物頒賞珍品此乃天高地厚之恩爾等回國不可不知感激至爾國向在粵東貿易卽係爾國一定口岸儻將來再有進貢之事總須在粵東收泊候督撫具奏請旨遵辦毋得徑往天津卽駛至彼處該官吏亦必遵旨駁回爾等豈非徒勞跋涉如此明白宣諭伊等自當畏威懷德不必與之辨論曲直也朕又思英吉利國於乾隆五十八年入貢時懇請在浙江甯波貿易此次該國貢船來往經過浙洋並未寄碇其意似專欲來天津貿易以遂其壟斷之謀該督總當設法將伊國來津之意嚴行杜絕使之不萌此念卽來亦不能徑達方爲妥善至噉啞等五人旣均係夷商見在仍

准該國貿易自不必全行驅逐致啓其疑卽聽從其便可也○戊子百齡因病乞假允之以松筠署兩江總督○己亥諭本日潘世恩差人齎摺奏請終養又因伊子中式舉人具摺謝恩潘世恩前以丁憂回籍本年九月服闋又值伊子中式舉人伊係一品大員自應親身來京具摺陳謝卽因伊父年逾七旬欲求終養亦應於到京召對時據實陳請朕必俯允所請今伊摺內止云體察伊父精神迥不如前並非疾病沈篤刻不可離潘世恩來京往返不過月餘乃憚於跋涉輕率陳請殊乖人臣之義潘世恩著降爲侍郎准其終養俟養親事畢後來京以侍郎補用○命協辦大學士禮部尙書章煦軍機處行走○甲辰諭國家設立部院衙門遇有交議事件各堂官應虛衷商榷俟詢謀僉同方可畫稟連銜具奏如事關重大有交大學士軍機大臣會同各該衙門議奏者原以一

人之心思有限眾人之才識無窮尤應公同籌酌以期事臻盡善
或其事眾人皆以爲是中有一人獨覺其非卽應抒其所見向眾
人剴切陳說其言果當眾人自當擇善而從其言不當眾人亦可
面折其非如其人心仍不服朝廷本有兩議之例卽當自抒己見
據實直陳候朕裁定朕執兩用中言之是者卽降旨俞允言之非
者亦必降旨駁正乃近有公同會議之事有一二人又於召見時
以所議未協向朕前密陳是竟強勉唯阿而復退有後言其心實
私而不公豈忠臣體國之義乎嗣後凡遇特交會議事件務須公
同定擬必意見毫無異同方可會銜陳奏若意見不合卽單銜具
奏其會奏摺內無庸列銜此時在廷並無攬權專擅之臣儻有遏
抑羣言阻其獨奏者准其人指名參劾若於畫奏具奏之後向朕
前別生異議則是首鼠兩端其人殊不足取茲特明降諭旨詳細

曉諭以後凡特交會議摺內俱先將此旨恭錄於前所有此次御史羅家彥條奏籌畫旗民生計交八旗都統會議一摺奏上時卽著將此旨載入○調恩甯爲盛京刑部侍郎以多福爲盛京工部侍郎

由副都統遷

十一月丁未改廣東新甯縣鹽場大使爲上川司巡檢廣海寨巡檢爲主簿○壬子諭陳預奏李達亨於黃河情形不甚熟悉近日河勢北趨魏家埠道迤東迎溜頂衝明歲必須加意修防李達亨每喜於隄內添築土壩不惟與水爭地抑且引溜生工轉多糜費豫東二省險工林立李達亨到東河日淺未能曉暢機宜難保不爲廳員蒙混等語朕本日召見吳璥據奏稱李達亨於東河河務機宜實未熟諳其言與陳預相符兩年以來河流順軌由於海口深通建瓴直下此時上游修防尤關緊要李達亨於黃河情形既

未能熟悉著仍回永定河道之任伊在河東河道總督任內並無
咎愆著加恩賞戴三品頂帶其河東河道總督員缺著葉觀潮以
三品頂帶補授俟明年三汛安濶後再行施恩又充沂曹道斌良
於河務情形亦未諳悉著發往江南以地方道員補用其所遺員
缺著張鼎補授○調孫玉庭爲兩江總督以阮元爲湖廣總督調
文甯爲河南巡撫以朱理爲貴州巡撫彭希濂爲刑部右侍郎

副都御史遷

○兩江總督百齡卒贈協辦大學士遣乾清門侍衛博啓

圖往奠茶酒予祭葬諡文敏以其子扎拉芬襲男爵○癸丑以莫
晉爲左副都御史

服闋左副都御史

○調繼昌爲江甯布政使李堯棟爲

雲南布政使○甲寅諭八旗都統等奏駁御史羅家彥條奏籌暨
旗民生計章程一摺所駁甚是該御史條陳以爲旗民生計艱難
欲令八旗老幼男婦皆以紡織爲業當奏上時朕卽覺其事不可

行今該都統等所奏原論果俱以爲事多窒礙公同議駁本日特
召見諸皇子軍機大臣等明白宣諭我八旗滿洲首以清語騎射
爲本務其次則誦讀經書以爲明理治事之用若文藝卽非所重
不學亦可是以皇子等在內廷讀書從不令學作制藝恐類於文
士之所爲凡以端本務實示所趨嚮我朝 列聖垂訓命後嗣毋
改衣冠以清語騎射爲重 聖謨深遠我子孫所當萬世遵守若
如該御史所奏八旗男婦皆以紡織爲務則騎射將置之不講且
營謀小利勢必致漸以貿易爲生紛紛四出於國家贍養八旗勁
旅屯住京師本計豈不大相刺謬乎近日旗人耳濡目漸已不免
稍染漢人習氣正應竭力挽回以身率先豈可導以外務益遠本
計乎卽如朕三年一次閱選秀女其寒素之家衣服尙仍儉樸至
大臣官員之女則衣袖寬廣踰度竟與漢人婦女衣袖相似此風

漸不可長見在宮中衣服悉依國初舊制乃旗人風氣日久華靡甚屬非是不能齊家焉能治國各王公大臣之家皆當力敦舊俗倡挽時趨以副朕崇實黜華之意羅家彥此摺若出於滿洲御史必當重責四十板發往伊犁姑念該御史係屬漢人罔識國家規制但伊識見如此竟欲更我舊俗豈能復勝言官之任著革退御史仍回原衙門以編修用將此通諭知之○己巳韓對丁父憂賞治喪銀三百兩調章煦爲刑部尙書周兆基爲禮部尙書以茹茶爲工部尙書吳芳培爲吏部右侍郎署兵部左侍郎○庚午調熙昌爲吏部左侍郎秀甯爲刑部左侍郎

十二月己卯以廉敬署江西按察使

由內閣侍讀學士署

○辛巳以莫晉爲

倉場侍郎

由左副都御史遷

○庚寅以王引之爲左副都御史

由大理寺卿遷

○

戊戌調富倫爲安徽按察使以汪如淵爲山西按察使

由鴻臚寺少卿遷

○是歲朝鮮琉球英吉利來貢○會計天下民數數各省通共大小男婦三萬二千八百八十一萬四千九百五十七名口各省通共存倉米穀三千二百六十五萬一千四十三石三斗七升六合五勺

東華續錄

嘉慶四十三

臣王先謙敬編

臣周倫蕃恭校

嘉慶二十二年丁丑春正月己酉諭湖北民人向習邪教經該地方官宣諭開導具結改悔者三四百名可見能知大義化誘爲良所全者多矣直隸山東河南向來邪教最多山西近亦有傳習者愚民無知苟圖目前小利不顧日後大害若不導以漸洗之路蚩蚩者氓畏罪隱匿是仍不能化其汙俗咸與維新實堪憐憫莫若倣照湖北出示曉諭凡真心悔悟將經卷及一應邪書到官投繳銷毀卽奏明免罪朕必照例施恩地方少一誘民卽多一良民較之逐處搜查豈不事半功倍乎○甲寅諭國家一日二日萬幾朕辦理庶務惟日孜孜內外章奏無不隨時批答從不稍存遲屈其

諏吉舉行者皆事關典禮卽古人外事剛日內事柔日之義非尋常事件所當比例也乃直省各督撫奏事於拜摺時先擇吉日又豫擇吉日屬令差弁於到京後屆期呈遞是以近日遇開破之日竟全無奏摺遞成開之日數省之摺彙齊呈遞朕檢閱時愍書其日必係良辰甚屬可笑可鄙卽在京各部院引見奏事亦往往選擇吉辰均屬陋習著通諭內外各衙門嗣後遇有應辦之事務各迅速辦理一經辦竣立即具奏毋得仍前拘忌選擇良辰致有叢朕用副朕勤求治理至意○諭上年曾經降旨俟百齡靈柩到京准其入城治喪並著軍機大臣屆時奏聞派皇子至伊家賜奠昨據松筠奏徐州府屬邳州窮民攔路呼號懇請撫恤事關民瘼前此百齡在任時未能查辦周詳使其尙在必當治以應得之罪今已身故姑免追究百齡靈柩到京時無庸奏派皇子賜奠仍准其

入城治喪○定地方官疏脫軍流人犯加等議處例○壬申 上
御經筵○諭朕恭閱 聖祖仁皇帝實錄內載康熙四十七年八
月 諭諸大臣曰近日聞諸阿哥常擁辱諸大臣侍衛又每尋釁
端加苦毒於諸王貝勒等諸阿哥見今俱未受封爵卽受封後除
伊屬下人外凡有罪過亦當奏聞候朕處分伊等何得恣意妄行
捶撻乎朕爲天下元后凡事但遵大義而行無罪之人未嘗枉法
處治國家惟有一主諸阿哥擅辱大小官員傷國家大體此風斷
不可長嗣後諸阿哥如仍不改前轍許被撻之人面詰其見撻之
故稍有冤抑卽赴朕前叩告朕且欣然聽理斷不罪其人也至於
爾等有所見聞亦應據實上陳若一切隱諱後來漸至殺人亦將
隱而不奏乎爾等隱而不奏卽加等治罪矣等因欽此仰見 聖
訓煌煌端本養正之至意見今皇子等恪遵綱紀實無有逞性作

威之事但諭教之道不可不先 聖祖貽謀洵爲萬年法守皇子等皆當聰聽 彝訓知所鑒戒况左右隨從之人如諸達哈哈珠色太監等遇有過失據實奏明候朕處治不可任性妄行有乖禮則再朕聞近日上書房四阿哥均係按日授經二阿哥三阿哥不立課程二阿哥尙閒日撰作詩文三阿哥則經年累月詩文俱置不作朕在潛邸時未有一日不作詩文今雖日理萬幾於政事之暇尙時時游藝不肯稍有暇逸御製詩文日月編排卷帙繁富阿哥等日在書房並無他事又無旗務管理若僅卯入申出不肯留心問學豈不竟成佚曠夫人之心志不專於此必移於彼豈可別有所好關繫甚鉅奚若游藝詩文發抒經史可以陶冶性情增長知識且日有常課亦以收其放心其獲益實非淺鮮嗣後二阿哥三阿哥每日俱應作詩閒三五日必作文一篇不可閒斷使業精

於勤勿荒於嬉以收逸志時數之效著將此旨鈔錄一通交上書房存記俾皇子皇孫等觸目儆心永遠欽承

二月丁丑釋奠

先師孔子○庚辰諭英和等奏南營汛地南橫

街地方舉人劉經裕家被盜將專汛都司及參將遊擊等參奏交部議處一摺此案盜犯執持器械嚇禁事主強劫銀物近在幫輓之下實屬目無法紀著步軍統領衙門五城一體嚴拏務獲按律懲辦至向例京城地面盜案三月無獲始行提奏未免過寬嗣後京城外七門以內尋常竊盜案件三月限滿題參如有執械嚇禁強劫之案二月無獲卽行題參其九門以內尋常竊盜案件二月題參強劫之案一月無獲卽行題參著爲令○壬午諭和甯等查明西甯縣私運倉糧並捏報採買大槩情形一摺此案河州知州前任西甯縣知縣沈仁澍與已革西甯縣知縣楊毓錦交代夥贖

不清沈仁樹離任三年之久忽遣家人董幅赴西甯縣私自開倉搬運豌豆二千九百餘石實屬膽大妄爲沈仁樹著革職拏問楊毓錦任聽沈仁樹家人私搬豆石且該縣倉儲見在查明實貯糧九萬八千餘石應撥兵糧不過八千一十餘石儘敷支放乃隱匿糧款另估採買楊毓錦前已革職拏問著和甯帥承源提集該革員等並沈仁樹家人董幅及倉書人等秉公嚴審確情按律定擬具奏西甯道龍萬育知府錦明近在同城並不據實稟揭難免扶同徇隱情弊俱著解任歸案質訊先福於陳啓文稟揭楊毓錦隱匿倉糧不行查究沈仁樹侵冒銀糧龍萬育徇隱不辦亦不據實嚴參實屬有心徇庇先福著先行革去頂帶交部嚴加議處卽在蘭州聽候部議所有陝甘總督卽務著和甯署理○癸未諭汪志伊等奏提審改教知縣朱履中稟揭原管道府得受陋規一案解

任藩司李廣芸自縊懷有親筆紙片不肯認誣等語此案前交汪志伊王紹蘭審辦李廣芸係解任之員該督撫並未派員看管以致自縊如李廣芸實無得受陋規之事朱履中肆意誣訐該藩司豈非含冤畢命儻實有其事則係畏罪自盡藉免國法汪志伊王紹蘭辦理疏忽咎實難辭俱著交部議處見已派熙昌等前往該省秉公審辦所有案內人證汪志伊王紹蘭均無庸覆審著將已革改教知縣朱履中先行拏問解任漳州府知府畢所詣先行革職及李廣芸家人黃升並案內應訊緊要人證俱嚴行鎖押分別監禁派員嚴密看管聽候欽差審辦儻再有疏虞定將該督撫治罪不貸○以長齡爲陝甘總督由伊犁將軍遷○以明山爲福建布政使韓文綺爲廣東按察使由直隸清河道遷○甲申以常英爲理藩院左侍郎由內閣學士遷○乙酉奪先福職○乙未諭國家向遇旬慶大典或鑾

輅時巡臣工等例得呈獻詞章明年朕巡幸盛京祇謁三陵越
歲己卯屆朕周甲旬慶諸臣雍容揄揚合諸天保頌君之義原以
達下情而光盛典但呈進之人應辨以差等其文亦應示以體裁
茲特先期通行告諭凡宗室王公內其能文者俱准呈進在內滿
漢大臣京堂翰詹科道在外督撫凡由科甲出身一體照例備進
此外槩不准呈遞至廢員係罷斥之人尤不應越分妄干儻有違
例僥倖者各衙門槩不准接收再近來進呈各冊往往貪多務博
競爲纖巧新奇甚非人臣對揚之體朕於宮中披覽舊時臣工所
進冊葉每人或詩數首或頌賦一章詞旨敦厚體裁亦復正大嗣
後諸臣進冊者每人止進一冊詩文亦各專一體毋許誇多鬪靡
華而不實其擇言務求雅正尤當頌不忘規期於政事有裨用副
朕返樸還淳釐正文體至意○丙申以英綬爲內閣學士

由副都
統選

三月甲辰朔汪志伊以疾免以董教增爲閩浙總督調陳若霖爲廣東巡撫以李堯棟爲雲南巡撫祝慶承爲雲南布政使程卓樸爲廣西按察使

由直隸大順廣道遷

○丁未

皇后行躬桑禮

○諭大挑舉

人原以疏通輿畋近來各省分發人員漸覺壅滯昨經大學士會同吏部酌議章程量加調劑朕思南河東河北河三處河工亦需員差委若於此項大挑一等人員內分發試用俾之學習河務以河工之繁簡定人數之多寡既可策勵人材亦可疏通額缺其應如何酌定員數並試用甄別限期及補用缺分章程著吏部詳議具奏尋議分發南河三十員東河二十員北河十員赴工差委一年期滿甄別擇其諳練河務堪膺民社者咨部註冊以知縣用照地方以原銜借補佐貳之例先行咨署管河佐貳俟經歷三汛後實授遇有沿河調缺知縣缺出准其調補若甄別以佐貳改補者

得缺後照見缺升轉不准調還知縣得旨此項大挑一等分發河
工人員著定爲試用二年經歷六汛後甄別該河督秉公察看其
能通曉河務者留於河工照新定章程分別補用如河務不能諳
習而才具尙膺民社者奏明改撥地方仍以知縣補用其才識迂
拘者以教職改補○戊申諭上年大學士會同兵部議奏天津添
設水師請將新添水師兵一千名分爲左右兩營歸天津鎮總兵
統轄該鎮向係專管陸路且每年有催趲漕運差使事務本煩今
將水師兩營歸其統轄恐洋面一切巡緝操防未能兼顧著再添
設天津水師總兵一員將添設水師營弁兵丁令其管轄以專責
成其應給敕印俸廉及建蓋衙署各事宜著各該衙門迅速具奏
照例辦理若因循疲玩定行重治不赦○辛亥 上親耕藉田○
壬子 上啓鑾謁 東陵○免經過地方額賦十分之三○丁巳

上謁 昭西陵 孝陵 孝東陵 景陵 裕陵回鑾○己未

諭伯麟等奏確查臨安邊外夷匪滋事情形分別招撫堵剿一摺
逆夷高羅衣膽敢自稱窩泥王並將附從漢奸等僞封官職裹脅
至萬餘人搶擄江外土司地方復率眾搶渡窺伺地方實屬罪大
惡極事關邊境軍情伯麟此摺僅由三百里具奏殊屬不曉事體
嗣後奏報皆當由五百里馳遞俟辦理完竣卽由六百里馳奏見
在僞封軍師之漢奸章喜業經擒獲訊明該逆等犯事緣由伯麟
雙林等已調派本省官兵及廣南土練定期進剿此事務須一鼓
撲滅不可因循疲玩如見調兵力尙有不敷貴州官兵素稱趨捷
該督卽行添調或一千名或五百名迅速來滇選派曾經出師打
仗奮勇將弁帶領迅卽進剿此時賊眾初集兵貴神速趁此煙瘴
未起之時立即擒渠堵穴不可靳惜小費遷延時日若辦理遲緩

一至暑熱瘴生官兵卽須撤退使賊得以乘暇裹脅秋冬再舉則勞費更重伯麟等務勉力辦理將首逆高羅衣及逆姪高偕沙等剋期擒獲凌遲處死其餘烏合之眾自必卽時瓦解其章喜一犯暫行牢固監禁俟首逆就擒質訊明確一併凌遲以伸國法而靖人心○乙丑 上幸南苑行圍○戊辰周兆基卒以盧蔭溥爲禮

部尙書調姚文田爲戶部右侍郎黃鉞爲戶部左侍郎以湯金釗爲禮部右侍郎

由內閣學士遷

○己巳調禧恩爲戶部左侍郎轉常福爲

兵部左侍郎以穆彰阿爲兵部右侍郎

由內閣學士遷

○庚午

上還京

師○辛未章煦因病解任以吏部尙書戴均元協辦大學士調吳

璥爲刑部尙書盧蔭溥爲兵部尙書以戴聯奎爲禮部尙書汪廷

珍爲左都御史王引之爲禮部左侍郎

由左副都御史遷

○以汪如淵爲

順天府府尹承光爲山西按察使

前任山東道御史

○贈故順天府府尹

費錫章兵部侍郎銜予祭葬○壬申諭向來部院遇有議處事件每因查被議之員有無加級紀錄以致議奏遲延嗣後著於奉旨五日之內卽行議上其例不准抵者於摺尾聲明卽係應以級紀議抵者亦無庸先行查計著於摺尾聲明例係應行議抵之案可否准其抵銷請旨遵行如奉旨不准抵銷無庸查計若准抵銷再行查明覈辦

夏四月甲戌朔日有食之○丁丑增設曹州鎮總兵官遊擊守備各一員改東昌營都司爲右營撥鉅野等七營隸之○壬午賜強克捷子望泰進士○丁亥 上閱健銳營兵○諭陳預奏請將因公降革送部引見知縣就近捐復原官留東補用一摺向來部議降革人員降旨令該督撫出具考語送部引見者均係因公案件引見時朕量材錄用其年力強壯人材可觀者多加恩以原官補

用如年齒衰頹卽照部議降革若將送部引見之員先令其捐復再行送部引見是已准其復還原職引見轉屬具文殊屬取巧所有該撫請將革職知縣張日昇降調知縣劉東里就近捐復原官留於東省補用之處著不准行仍遵前旨將該二員送部引見嗣後各省凡係部議降革有旨送部引見之員俱不准先行奏請捐復若部議降革未經奉有送部引見之旨者如該員官聲素好熟悉地方情形准該督撫代爲奏請捐復仍聲明將該員先行送部引見俟引見奉旨准其捐復再令該員交納捐款以原官補用○
庚寅停伊犁仲夏進馬○辛卯諭軍機大臣等伯麟等奏勦平江外逆夷邊境肅清一摺首犯高羅衣以江外夷民膽敢謀逆滋事據該犯供稱因江西湖廣等處漢人在夷地貿易取利甚爲刻苦遂借驅逐漢人爲名聚眾謀逆等語夷民愚蠢無知多因內地民

人私往夷地或潛相煽惑或激生事端釀成大案致勞兵力戕害
生靈此案拏獲之僞軍師章喜一犯卽係漢奸見將首從各逆悉
數殲獲邊境敕甯正當趁此出示曉諭嚴飭沿邊各州縣凡內地
民人不准私往夷地貿易侵奪夷人生計若有私越邊境者查明
嚴禁治罪務令弭患未形勿再滋生邊隙爲要○以勦平夷匪高
羅衣首夥各犯加伯麟太子少保○壬辰軍機大臣會同刑部議
奏已革知州沈仁澍侵盜倉糧運腳一案得旨此案已革河州知
州沈仁澍盜賣倉糧侵蝕運腳並虧缺倉庫共銀九萬餘兩本應
卽行正法將所虧銀兩在伊家屬名下勒追該革員先經畏罪自
盡倖逃國法著將伊子沈德林發往烏魯木齊以示懲儆已革陝
甘總督先福身任封疆收受屬員供應餽送又濫保貪墨劣員罪
無可逭先福著照議發往伊犁效力贖罪前署陝甘總督高杞率

准沈仁澍領運倉糧黃方承領運腳署藩司德克精阿私發庫銀

數萬餘兩並不查究實屬溺職高杞著卽革職餘依議○以伊冲

阿爲理藩院尙書

由烏里雅蘇台將軍遷

○甲午以吳其彥爲內閣學士

由事

賈允升爲左副都御史

由宗人府府丞遷

○戊戌賜吳其濬等二百五

十五人進士及第出身有差○壬寅命刑部清理庶獄

五月乙巳減直隸軍流以下罪○丙午諭向來新進士朝考以論

詔疏詩四項命題其詔題多係擬古朕思士子文藝試以論疏詩

三項其優劣已可槩見擬作古詔不過臨時強記敷衍成篇況可

擬古詔本屬無多厯科命題幾徧嗣後新進士朝考著裁去詔一

道以論疏詩三項命題著爲令○辛酉 上詣 天神壇祈雨○

諭那彥成獲罪應發伊犁因伊母年老病篤暫免發遣茲伊終養

事畢仍應發往伊犁念其前在滑縣剿賊著有微勞那彥成著加

恩免其發遣在家閉門思過○以博啓圖爲理藩院右侍郎

由內閣學

士○壬戌兩○丁卯諭熙昌等奏審訊朱履中稟許道府收受陋

規藩司李廣芸被偏自縊等情分別定擬一摺此案朱履中以衰

庸難勝繁劇改教後許控該管道府得受陋規業經該督撫於參

奏後訊據朱履中供明係屬誣控乃汪志伊等以參奏李廣芸解

任在前欲資其言屢審屢駁奉審之署道涂以轉卽心存迎合以

李廣芸家人黃升會向朱履中私借洋銀三百圓惟此一款屬實

爲數太少難以稟覆督撫定案卽向李廣芸私商令其添認銀兩

李廣芸並未寫供迨至身故後文卷內忽有供詞一紙稱朱履中

曾有代墊修船洋銀一千六百餘圓係應還之款已措交張均代

完公項此供並非李廣芸親筆亦未畫押竟係涂以轉自出己意

代李廣芸敘供誣認又拍案厲聲偏勒難堪致使李廣芸情急自

盡汪志伊於李廣雲身故後應及自干咎戾復提訊朱履中加以恐嚇以李藩司係伊偪死並以但云餽送節壽陋規屬實就可有命之語向其引誘朱履中遂聽信翻供及嚴究經據朱履中以事本局有不能指實是李廣雲之死由於汪志伊固執苛求而成於涂以駟之勒供陵僞熙昌等僅將涂以駟擬發軍臺效力實屬輕縱熙昌王引之俱著交部議處汪志伊年已衰邁辦事復如此謬誤毋庸交部嚴議著卽革職永不敘用王紹蘭雖無投意情事但隨聲附和疊次聯銜具奏著照所請交部議處所有此案罪名著軍機大臣會同刑部另行覈議具奏尋議上得旨此案知府涂以駟於委審朱履中稟許道府一案既訊明李廣雲實無收受陋規情事乃因汪志伊等展轉駁飭輒於李廣雲供內添入朱履中代墊修船洋銀一千六百餘圓竟行寫入附卷雖據供稱伊與李廣

雲商量依允其言已在李廣芸故後毫無證據其爲自出己意迎合上官情弊顯然且涂以鞫親書供詞亦稱李廣芸操守清廉眾所共知乃抑勒陵偏必欲被以貪污之名是何居心涂以鞫者發往黑龍江充當苦差到配之日再加枷號三箇月以示懲儆餘依議○戊辰諭前據熙昌等奏李廣芸故後福建士民感泣祭奠者踵接於門熙昌等行抵省城有紳士耆民林光天等三百五十餘人具呈臚具李廣芸生前政蹟捐貲建立遺愛專祠請據情入奏抑或賜額表揚等語見在朱履中控告李廣芸等一案已據熙昌等訊明李廣芸實無得受陋規情事但伊家人黃升在船工廠曾向朱履中索借洋銀三百圓李廣芸失於覺察亦有應得之名至李廣芸之死雖由於涂以鞫勒供陵偏但伊係藩司大員緝事逮問如果有實在罪愆自當靜俟國法若此心斂然橫遭冤枉亦

應據實控訊朝廷必爲昭雪乃率效匹夫溝瀆之諒情性殊爲穩
急李廣芸不應特予旌揚若聞省士民追思惠政自願捐貲立祠
此則斯民直道之公悉聽其便○庚午諭王紹蘭身任巡撫刑名
案件是其專責此案朱履中誣訐道府收受陋規藩司李廣芸被
偏自盡固由於汪志伊刻覈苛求王紹蘭係同審之員果能持正
商阻汪志伊或不偏執已見涂以鞫必不敢肆意陵偏李廣芸亦
不至憤激輕生卽或汪志伊執拗難回王紹蘭儘可據實單銜陳
奏乃一味隨聲附和釀成巨案實屬溺職王紹蘭著卽照部議革
職○以史致光爲福建巡撫毓岱爲貴州布政使王帑督貴州按
察使

前任江西按察使

○王申頒

御製望雨省愆說

六月甲戌諭乾隆四十三年 皇考高宗純皇帝躬謁盛京 特
降諭旨垂示後嗣必當體懷遠藩舊疆再三周歷新於 祖宗遺

結身親目覩或無識臣工妄以爲不宜當律以悖命之罪誅之無
赦朕敬承 聖訓擬於明秋再舉恭禱 三陵大典用展孝思時
向臣工言及尙未明降諭旨今夏亢旱未得甘霖昨據大學士松
筠摺奏致旱之由因朕欲詣盛京 列聖示象阻止等語實屬夢
囈怪誕極矣成湯遇旱六事自責六事中有謁祖陵乎况一年後
之事先爲此言播惑眾心大玷首輔之職矣設若明年直隸及盛
京遇有歉收朕亦不待奏請何難降旨展期乎上年因縣課阻止
秋獮會降旨儻有造作浮言阻止者必按軍法今松筠因夏令微
旱竟敢阻止明歲上陵鉅典較秋獮爲尤甚此奏若在明降諭旨
之後朕必將松筠置之重典仰承 皇考律以悖命之罪立行正
法但今逢苦旱之時有罪之犯尙欲減等究在未降諭旨之前是
以交軍機大臣會同吏部議處本日奏上議將松筠革職實屬咎

有應得姑從寬典薄示降謫朕從不因言罪人此等顯脩 聖訓
之論不能不懲治也松筠著革去大學士御前大臣領侍衛內大
臣都統並各項差使以二品頂帶補授察哈爾八旗都統仍帶革
職留任八年無過方准開復此朕準情示罰不得已之苦衷此心
不懈期親待天下臣庶其諒之此旨著上書房存記皇子皇孫
懷承勿忽仍通諭中外知之○命明亮爲武英殿大學士以伯麟
協辦大學士仍留雲貴總督任調和甯爲兵部尙書伊冲阿爲工
部尙書以晉隆爲理藩院尙書由領侍衛內大臣遷○戊寅以舒甯爲內閣
學士由太常寺卿遷○辛巳加明亮太子太保戴均元和甯盧蔭溥太子
少保○乙酉大雨○丙申諭盛京每歲派員巡緝海口

東華續錄

嘉慶四十四

臣王先謙敬編

臣周澍恭校

秋七月壬子定宗室覺羅養贍孤寡例○癸丑習振翎以年老不職革職以周光裕爲山西布政使嚴煥爲湖北按察使

降調甘肅布政使

○甲寅諭太常寺進呈清文則例第三十六卷內

世祖章皇帝

孝惠章皇后

孝康章皇后

聖祖仁皇帝均未出格擢寫該

員等並不敬謹校對非尋常疏忽可比太常寺滿洲堂官俱著交

部嚴加議處其前次奏請議敘之處著卽撤銷所有紙工等項均

不准開銷該衙門漢堂官不識清文均無庸議尋議上得旨成甯

著降爲內閣侍讀學士候補舒甯色克精額均著降爲六品贊禮

郎○丙辰調和甯爲禮部尙書伊冲阿爲兵部尙書以蘇楞額爲

工部尙書果齊斯歡爲工部左侍郎

由內閣學士選

○戊午諭御史李振

祐奏請禁考試騎射頂替積弊一摺所奏甚是八旗以騎射爲根本是以考試進士舉人生員以及考試繙譯均先閱看騎射其弓馬生疏者卽不准應試此我朝之舊典必應永遠實力奉行若其人素不練習騎射臨場倩人替代卽與文場考試槍替無異必應按律治罪嗣後凡遇此項考試著各旗都統等親身先行考驗能騎射者始准送名派出監試之王大臣於考試時令各旗章京等逐排識認射畢步箭卽射馬箭仍令本人下馬至階前報名如查有替代情弊將雇倩之人與替代之人一併治罪儻監試王大臣等市惠徇縱別經發覺定將王大臣等一併懲處嗣後遇有考試著報明御前大臣奏派乾清門侍衛二人至放馬處監視○庚申

上啓鑒秋獮木蘭○免經過地方額賦十分之三○癸亥諭前

據御史葉申萬奏藩司李廣芸自盡一案閱省輿論咸謂由於張均之多方激成張均前已奉旨革職熙昌等不應奏請開復原官交部察議當即降旨交董教增秉公確查茲據奏稱確加查訪閩省實有此案係張均激成之論以張均接收交代朱履中短缺鹽課二千餘兩欲將書欠作抵張均不允催交見銀朱履中情急遂有稟託原管道府收受陋規之事儻張均稍肯通融朱履中必無此稟亦可無李廣芸自縊之事竟委窮源鞫咎於張均交代刁難等語朱履中短缺鹽課以書欠作抵本屬違例張均不肯接收尙爲持正外省州縣交代互相牽混者多接任者不加詳查扶同徇隱以致虧缺相仍張均之不肯通融正係照例辦理安得謂之有心挑剔至朱履中之情急捏稟李廣芸之被誣自盡皆非張均之所能逆料該員之過惟在代朱履中墊銀三百兩以圖自免交

代遲延處分又代朱履中改削捏造家人何佳姓名混請銷案稟帖有此二節均干例議若張均並此而無之卽察議亦無庸矣此案業已查明張均著仍照熙昌等原擬開復原官交部察議熙昌王引之所擬並無輕縱著無庸議○乙丑諭成格等奏審擬陽曲縣派差苦累一摺此案衡齡失察之咎尙輕惟該省藩司習振翎老病昏庸一任幕友家人主持公事該撫近在同城日日接見豈得諉爲不知乃有心徇庇聽其貽誤地方吏部照溺職例議以革職實係咎所應得衡齡著革去山西巡撫另降清字諭旨賞給藍翎侍衛前往新疆換班其案內應議各員著交吏部議奏各犯罪名著交刑部議奏○以和舜武爲山西巡撫廣慶爲山東布政使調廉敬爲雲南按察使以卬樹棠爲江西按察使由江蘇糧道遷○丙寅上駐蹕避暑山莊○戊辰調卬樹棠爲山西按察使承光爲江

西按察使○己巳晉隆以失察宗室習教從逆奪職以和世泰爲

理藩院尙書

由總管內務府大臣遷

○以裕恩爲內閣學士

由頭等侍衛遷

○辛未

諭熱河兵丁向無普賞一月錢糧之例 皇考高宗純皇帝每年

五月駐蹕避暑山莊八月始行進哨該兵丁等安設堆撥直班日

期較多且射靶中箭人數亦多是以 特恩普賞一月錢糧自朕

巡幸熱河兵丁步射尙好是以照舊普賞去年今年均因兵丁等

步射較前平常中箭人數稀少將都統和甯慶博交部察議協領

等議處兵丁等仍賞一月錢糧此二年內該兵丁步射俱屬平常

自係倚恃賞項平日並不留心學習從前 皇考高宗純皇帝五

月間卽來巡幸該兵丁值班日期較多尙能乘暇操演朕七月間

始來熱河豈轉無暇操練耶此而不示以懲戒恐兵丁等漸習偷

安朕明歲恭謁 祖陵不克巡幸熱河後年朕臨幸若該官兵等

步射仍如此平常不惟將該管都統章京等從重議處並將普賞一月錢糧之例永行停止止將中靶兵丁及厄魯特兵丁照例賞給此旨著交熱河都統傳諭章京兵丁家喻戶曉一體懍遵

八月丙戌以故和郡王縣循子奕亨降襲貝勒○丁亥 上自避

暑山莊巡幸木蘭行圍○戊戌諭海康見已訊明十八年八月曾經逆犯劉得山將九月十五日起事業已將伊算入林清事成給伊大官職之言向告伊當卽應允該犯身係宗室乃不爲大清國之臣子甘受叛逆官職狂悖已極慶遙經海康將滋事日期告知約令人夥亦卽應允並於九月十四日在海康家候信海康慶遙厥罪維均著曹振鏞等卽將該二犯按律定擬慶豐僅經慶遙將九月十五日街上有打搶之言向告並未明露逆謀見又到官自首將助逆各犯全行捕獲審明辦理其罪尙可未減著照例減等

治罪晉隆敬徵屏翰前以海康等僅止入教豫知逆情是以降旨止將晉隆等革職仍留四品頂帶並充總族長族長見審明海康竟欲受逆賊林清官職慶還亦甘心入夥與曹綸情罪相同失察曹綸之祿康前經發往盛京該總族長族長等均應照祿康之例懲處姑念晉隆係總轄之員且伊母年老其兄晉昌又遠任伊犁將軍晉隆著革去四品頂帶總族長免其發往盛京卽令在家侍養伊母敬徵屏翰俱著革去四品頂帶總族長族長發往盛京在宗室營房內居住其家屬聽其帶往所遺總族長族長缺著宗人府另行揀選具奏○命復於木蘭西哨門內建興安大嶺神祠○辛丑頒 御製訓管理宗人府王公及諸族長文

九月己酉 上駐蹕避暑山莊○辛亥諭曹振鏞等奏審明海康慶還從逆罪狀及案內各犯分別定擬一摺我朝自開國以來宗

室中賢才輩出雖支分派別譜系蕃衍其中賢愚不一然從未有
干名犯義如海康慶遙之自外生成者該二犯拜奸民爲師學習
邪教已屬玷辱宗支乃海康於十八年八月經逆犯劉得山告以
九月十五日起事將伊算入之言其時劉得山之父逆犯劉興禮
尙知伊身係宗室從旁阻止不意該犯竟冀圖得受偽職甘與逆
謀慶遙身係奉恩將軍經海康將滋事日期向告約令人夥伊卽
允從並於九月十四日至海康家守候信息坐收其利海康慶遙
甘心背叛間擬凌遲處死實屬罪所應得惟是朕以仁心治天下
甯人負我毋我負人該二犯雖情真罪當猶念其究屬宗支實不
忍處以極刑海康慶遙俱著改爲絞立決派奕顯將海康帶往伊
祖父墳前監視勒斃派永珠將慶遙帶往伊祖父墳前監視勒斃
該二犯屍棺俱不准於該二家墳園內埋葬慶豐經海康引伊入

教後卽改悔且慶遙告以九月十五日有人打搶之言並未明露逆謀嗣恐家人倪六挾嫌告發旋卽到官自首習教因此始將海康慶遙二犯從逆重情逐一究明其罪應從未減慶豐著改發吉林其母妻二子亦俱著改發吉林俾令完聚交該將軍嚴加管束海康妻女著照擬發往黑龍江慶遙之妻子女亦著改發黑龍江俱交該將軍安插管束卽照縣課等所議章程另記冊籍辦理其餘各犯罪名著交軍機大臣會同行在刑部再行覈議具奏此旨到日著交阿哥等閱看並著管理宗人府王公通諭諸宗室知之

○癸丑 上自避暑山莊回鑾○四川總督常明卒贈太子少保

予祭葬諡襄恪賞銀五百兩治喪○調蔣攸銍爲四川總督阮元

爲兩廣總督以慶保爲湖廣總督葉紹桂爲廣西巡撫富綸爲廣

西布政使嵩孚爲安徽按察使

由山西歸綏道遷

○調玉轅爲廣東按察

使韓文綺爲貴州按察使○庚申

上還京師○辛酉諭國家簡

任大臣職分所在惟當竭誠盡力黽勉奉公若平日素餐耽逸怠忽因循及朕召對責問又復飾詞巧辨殊失忠以事君之義順天府有緝捕之責兩月以來步軍統領衙門五城奏獲匪犯多名該衙門未獲一犯前劉鏞之等至行在接謁朕面加詢問劉鏞之奏稱因府屬被旱籌辦撫恤煮賑等事是以未經派員緝捕朕卽詢以煮賑事宜劉鏞之於設廠地面米石數目又全不能奏對明晰是劉鏞之置捕務於不問而於撫恤事宜亦係虛詞搪塞部議照例革職實係咎所應得念其供職多年不至遽予罷斥劉鏞之著加恩降爲侍郎候補以觀後效汪如淵雖辦理遲延召對時叩頭引罪並未隨同巧詞支飾著加恩改爲革職留任○調盧蔭溥爲戶部尙書以章煦爲兵部尙書

病痊協辦大學士刑部尙書

○甲子撥京

倉米三千石於大興宛平二縣煮賑○乙丑胡克家卒調李堯棟

爲江蘇巡撫以李鑾宣爲雲南巡撫曹六興爲四川布政使富信

爲四川按察使

由浙江南
紹合道遷

○丁卯以哈爾阿載銓俱爲內閣學士

哈爾阿由太常寺卿
職銓由副都統遷

○己巳再撥倉米八千石於大興宛平二縣

煮賑○庚午頒

御製諫臣論於都察院

冬十月辛未朔日有食之○癸酉加賞五城貧民棉衣○辛巳李

鑾宣卒以李堯棟仍爲雲南巡撫陳桂生爲江蘇巡撫伊什扎木

素爲江蘇布政使調麟祥爲江蘇按察使以廉奇瑜爲福建按察

使

由臺灣
道遷

○乙酉諭盛京爲我朝發祥之地 締造鴻規式瞻

前烈我 皇考高宗純皇帝臨御六十年曾四次 躬詣恭謁

祖陵並 垂訓後嗣必當瞻懷舊疆再三周歷朕在藩邸時曾隨

侍 皇考東巡及寅承 大統恪遵 聖訓於嘉慶十年親詣陪

都祇謁 橋山越今十有二年緬維 祖 宗遺緒慕切獎牆允

宜再申叩謁敬薦肝膈特涓吉於明年七月二十二日自京啓鑾

前往盛京恭謁 三陵屆期令二阿哥三阿哥四阿哥隨往所有

一切典禮事宜著各該衙門照例敬謹豫備○庚寅賜武鳳來等

四十五人武進士及第出身有差○壬辰予故正黃旗滿洲副都

統福長安都統銜賞治喪銀三百兩○戊戌諭我朝 列聖相承

廣開言路朕虛懷納諫凡科道所上章疏其言是者無不採納施

行卽或識見迂陋所言不當亦每曲示包容不特不肯誅戮言官

卽如前朝批政廷杖諫臣亦從無其事本日朝審句到官犯內伊

縣秦蕭鎮二名俱予句決伊縣秦枉法婪贓法所難宥至蕭鎮職

居言路得以上章言事徇情聽屬已干法紀乃竟賄賂條陳以章

奏爲納賂之具欺君罔上孰大於此若不加嚴懲則言以賄行顯

倒是非變亂黑白勢將何所不至特將該犯明正典刑以昭炯戒
內外臣工當知朕所誅者乃壞法營私行同市僧之小人於上章
言事之諫官毫不相涉也將此明白通諭知之

十一月辛酉調韓文綺爲四川按察使富俊爲貴州按察使○甲
子諭國家設官文武並重大小官員接見均有一定體制不容意
爲卑亢朕近聞外省知府同知竟有與提督並行者若不亟爲整
頓恐蹈前明重文輕武惡習大有關繫著該部查明會典內文武
相見儀注開列具奏再通行頒示各省令各遵例以禮接見如有
意爲軒輊者交該督撫查明參處○乙丑調和甯爲兵部尙書以
穆克登額爲禮部尙書

由直隸泰
甯總兵遷

十二月甲午諭軍機大臣等本月 皇考高宗純皇帝聖訓清漢
本刊印全竣頒賞臣工松筠亦與分賞之列乾隆四十三年 皇

考親詣盛京恭謁 祖陵降 旨垂訓後嗣當瞻懷遠瀋舊疆再

三周歷或無識臣工妄以爲不宜當律以悖命之罪誅之無赦煌

煌 聖諭見恭載 聖孝門內松筠前次妄行陳奏或未曾恭讀

聖訓此次頒發到日著松筠敬謹焚香跪讀捫心自問伊率意

妄言當得何罪其時朕僅將伊降謫伊心是否允服知感知懼儼

自謂抱屈亦不妨直言卽行繕摺覆奏再松筠昨奏請賞給太僕

寺商都三百五十九羣牧官兵每羣牧各銀十兩朕以賞出無名

且每官兵所得無幾事非長策未予准行本日據松筠覆奏惟稱

今歲口外大雪各羣牧辛勤奮勉是以奏請鼓勵等語察哈爾地

方冬令雪大係常有之事歷任以來從無因此奏請鼓勵者松筠

今歲卽爲此舉若一年准其賞給則明年必將援以爲例歲糜數

千金亦非所惜究之牧羣人眾所獲幾何於馬政更有何裨益且

該處官兵等聞松筠一有此奏早已心生感激及知未蒙允行又必歸怨於上松筠天性好行小惠煦煦爲仁全不思經久長策亦不知爲政大體不可不痛自改悔也至瑞齡身任副都統遇事有窒礙難行者卽應阻止今一味隨聲附和與棍徒克策撈何異松筠瑞齡俱著傳旨申飭其所奏進哨調馬章程已交兵部覈議矣

○乙未論本日王大臣等因頒賞 皇考高宗純皇帝聖訓具摺

謝恩我朝

列祖

列宗皆以孝治天下

列聖徽號必以孝稱

誠以孝爲百行之首始於宮廷達於四海錫類推仁人人親親長長而天下平化理之原莫重於此也 皇考聖訓首列 聖孝六

十年中東西

兩陵

躬親展謁四時

廟祀

孝享惟虔盛京

爲 王迹肇基之地

列聖以來皆

躬詣陪都祇謁

三陵垂

爲典則惟以道途遙遠不能歲舉烝嘗是以或十年或十餘年輒

吉舉行世傳弗替我 皇考於乾隆四十三年三詣盛京時 睿
慮深長特降 旨垂訓後嗣當念遼瀋舊疆再三周歷斯於
祖宗遺緒身親目覩勿忘 開創艱難或無識臣工妄以爲不宜
卽律以悖命之罪誅之無赦煌煌 聖諭炳若日星本年夏間畿
輔一帶雨澤偶愆大學士松筠具摺陳奏請停止二十三年盛京
謁 陵之舉朕覽奏愕然若律以悖命之罪卽不立正典刑亦當
禁錮固圉朕念松筠在乾隆年間任事有年又經朕擢用首獎原
其陳奏尙在未降旨以前僅將伊降爲二品頂帶補授察哈爾都
統用示薄懲今 聖訓業已頒賜內外臣工著各恭檢 聖孝門
內 皇考原降 諭旨敬謹跪讀於朕懋處松筠一事當各曉然
於心知朕不得已之苦衷尙失之於姑息並未爲已甚也松筠奸
行小惠不識大體必有爲伊抱屈之人此等淺陋小人亦不值深

究任彼爲之朕亦不懼將此通諭知之○文甯以縱容僕從需索解任調和舜武爲河南巡撫以成格爲山西巡撫調廉善爲刑部右侍郎由禮右調○是歲朝鮮越南琉球來貢○會計天下民穀數各省通共大小男婦三萬三千一百三十三萬四百三十三名口各省通共存倉米穀三千四百九萬七千七百十石五斗一升四合一勺